

KERATAN AKHBAR

TARIKH : 14 MAC 2023

AKHBAR : SINAR HARIAN

PAUTAN : <https://www.sinarharian.com.my/article/249676/bisnes/12-juta-pertubuhan-terlibat-banci-ekonomi-2023>

1.2 juta pertubuhan terlibat Banci Ekonomi 2023



Rafizi (tengah) melancarkan Banci Ekonomi 2023, di Kuala Lumpur pada Selasa.

DIANGGARKAN sebanyak 1.2 juta pertubuhan perniagaan dan pertubuhan bukan berasaskan keuntungan di Malaysia akan diliputi dalam Banci Ekonomi 2023.

Menteri Ekonomi, Rafizi Ramli berkata, banci yang akan dilaksanakan bermula April hingga September itu melibatkan semua sektor ekonomi termasuk pertanian, pembuatan, pembinaan, perlombongan dan pengkuarian serta perkhidmatan.

Menurutnya, berdasarkan maklumat awal, Jabatan Perangkaan Malaysia (DOSM) menganggarkan pertubuhan mikro adalah sebanyak 75.2 peratus, kecil 20.5 peratus, sederhana 1.6 peratus dan besar 2.7 peratus.

"Menerusi banci ini, punca pertumbuhan baharu ekonomi dapat dikenal pasti dan DOSM berupaya menjana statistik ekonomi baharu yang signifikan untuk dipantau.

"Ini akan memberi data yang penting kepada kerajaan untuk digunakan dalam perangkaan dan juga perancangan dasar-dasar yang lain.

"Ada beberapa perkara baharu yang akan mula dibanci buat pertama kali melibatkan sektor-sektor baharu termasuk industri kenderaan elektrik, e-sukan, dron dan ada juga perangkaan sosioekonomi baharu seperti pemilikan oleh belia," katanya.

Beliau berkata demikian pada sidang media selepas merasmikan Majlis Pelancaran Banci Ekonomi 2023 di sini, pada Selasa.

Turut hadir, Ketua Setiausaha Kementerian Ekonomi, Datuk Nor Azmie Diron; Ketua Perangkawan, Datuk Seri Dr Mohd Uzir Mahidin dan Penolong Gabenor Bank Negara Malaysia, Fraziali Ismail.